

四庫全書

史部

欽定四庫全書

廣西通志卷六十七

名宦

明

熊繡字汝明寧遠人正德元年擢右都御史總督  
兩廣既抵鎮盡裁幕府供億秋毫無所取禁番舶  
抽稅絕中官饋送討平賀縣獍劉瑾嫉之伺察無  
所得乃召掌南京都察院尋罷之卒於家巡撫秦

金頌其清節於朝贈刑部尚書謚莊簡

獻徵錄

張鐸字振大江西泰和人正德元年授鬱林州同知民有兄弟爭訟者鐸諭以大義使退而自思輒不忍終訟州南有廢地鐸教旁近民使耕墾不取其稅荒蕪盡闢境內幾無餘利田州人爭地相仇殺藩省大臣委鐸同往平之鐸宣朝廷恩德與不忍加兵之意按圖籍考故實各循其舊衆皆悅服

舊志

張鳳字應時宜春人正德元年以左參政掌思恩府事時兵變之餘百姓流移庶務草創土目縱橫鳳撫輯流亡修舉廢墜給官田以贍生徒選智勇以嚴捍衛一切因革咸得其宜在任六年惠孚威協擢南京太常卿思恩九司兵民祔祭王陽明祠

舊志

陳軾大理人正德初官平樂教授時學政久廢軾立條約日與諸生講論經史課其藝行事母至孝



母病虔禱請以身代後軾卒於任諸生悼慟相率

至江濱祭送肖像祀之

舊志

鄭岳字汝華莆田人正德三年任兵備副使時諸

徭下叛下服情態叵測岳謂治外當自治內始於

是視郡城樓櫓圯壞者亟葺完之次及旁邑府江

廣運足難二堡亭障畢具保固隱若金湯

舊志

羅鏞福建建寧人正德間知武緣愛民好士興利

除弊建社學延社師武緣有社學自鏞始邑人感

其德祀於祠

舊志

胡世寧字永清仁和人正德三年遷廣西太平知府太平所領十五州縣皆土官異時守率利其貨賂否即輕易擾亂之世寧絕其私賄以禮接率馴服如長吏暇則過其幄閱騎射數教其民譬以利害民皆凜於法土官子弟應承襲者俾生歲即以聞府既十歲朔望攜入謁具識其年貌土官死即與保藁勿令展轉飽吏索土官悅服大平知州李

璿素撓法無敢詰世寧密授計龍英土知州趙元  
瑤立擒璿以獻思明叛族黃文昌等四世為逆殺  
其知府占三府二十七村累敗官軍總兵康泰與  
世寧入思明城執文昌兄弟三人既泰恐見劫夜  
委世寧去世寧所屬土官預伏兵張旗鼓護世寧  
還文昌懼歸所侵地降未幾以母喪去諸土官泣  
送數百里後至兵部尚書謚端敏

參名  
山藏

符觀字衍觀江西新喻人正德己巳擢廣西按察

僉事分巡左江會藍賊構亂一日謀報賊衆分攻  
平南貴桂三邑觀即督兵馳至平南江伺賊半渡  
擊之斫其渠魁中流湍沒不計其數潯衛將與卒  
訟田久不決以危言脅觀不為動竟質平焉潯民  
訴田少稅多期得減觀曰使田浮則欺上使稅浮  
則損下當驗實兩平已而田不少衆帖服節獻  
徵錄  
鄭寶字時珍福建莆田人正德間同知鬱林州署  
北流縣事時妖賊李通寶倡亂逼縣城寶與子宗

珪率兵出禦殺賊二十餘人賊稍却乘勝逐之父  
子皆死事聞加贈本州知州廕一子入國學立忠

孝祠以祀

州志

丁襄莆田人正德間同知平樂造就士類尤達治  
體所釐剔舉行皆因俗而利導之秩滿劉大夏薦

其才擢廣南守

舊志

蒙宗遠番禺人正德六年任靈川典史縣故多騷  
獍募驍民防守名曰打手皆捕官統之宗遠至戒

毋餽獻毋偷安約會練習人咸思奮時有賊號沖  
天將犯城率兵逐至周家灘斬之獲賊甚衆自是  
諸蠻屏息城堞久圯捐俸募役或時抱石為部民  
倡不旬月而告成至今賴焉

舊志

曹琚字仲玉郴州桂陽人正德六年由廣州知府  
調知梧州時都御史陳金總制七省調狼兵征江  
西寇惠潮又方有事總督林廷選難之以問琚琚  
曰江西寇株連閩廣功過與有歸矣宜速遣及江

西平惠潮亦奏捷林受賚以是知琚能妖賊李通  
寶竊發檄琚巡諸邑會北流已陷殺鬱林署印官  
擒巡捕通判以去林促琚歸引入問計琚請選梧  
兵之壯銳者追之而留其老弱居守又曰從征江  
西狼兵在河下出賞格以為梧兵助萬全之計也  
林因屬琚督軍遂偕諸將行聞賊在陸川冒險追  
之連戰皆克謀知賊必遁黃山即抽兵伏黃山下  
夜半賊果至伏發擊斬五十餘師駐鬱林林令大

軍為援通寶來攻狼兵又敗之賊黨逃散獲通寶  
於廢圃中斬之餘黨悉平出令招民之脅從者給  
牛俾耕選其子弟入學時學宮城郭官舍焚毀殆  
盡踞隨命工繕治未幾竣功民不知費又建議復

鬱林守備林從之

節舊志

徐錦字章甫正德間按廣西靖江藩府諸人怙勢  
為虐錦疏奏裁之以法屏跡不敢肆

舊志

薛金字子純江陰人正德間官僉事定妖人李通



寶連結猺獞之亂又贊畫招集岑溪北流諸邑民

全活無算

江南通志

施震常州人幼習韜鈴襲本衛僉事正德七年征北流野俚等處十三年征永安以功陞同知嘉靖四年統督後哨官兵征田州斬級三百餘陞陞廣

東都司僉事

舊志

劉啟雲南太和人正德七年知永福縣罷府倉之運免虛耗之徵省冗費清兵籍嚴立保伍撫諭諄

切民甦盜息擢賓州守

粵西文載

孫懋字德夫慈谿人正德間以論朱彬謫尉藤縣  
創南麓書院藤人尸祝之嘉靖中累官廣西右布

政力剋宿蠹汰冗費而涵容敦大人服其雅量

舊志

李守經汝陽人正德間知平樂府以愛民禮士稱

民有訟善諭遣之獄庭常空

舊志

顧璘字華玉上元人正德間初守開封忤逆璫謫  
知全州才質朗快然政在平恕尤以興賢育才為

首務重建柳侯祠增置亭宇俾士子游息風俗日興歲旱嘗徒跣詣禱覆釜山雨隨至歷官南京兵

部尚書

舊志

張祐鉛山人正德十年任兵備副使會荔浦寇起親部兵督戰俘馘以數百計乃修恭城縣城建富川守禦所築鍾山鎮城葺廣運足灘二堡飭邊固圍郡邑賴之

舊志

方良永字壽卿莆田人性至孝正德間忤劉瑾罷

職瑾誅復起歷陞廣西按察使風采峻整不嚴而

肅

舊志

黎磐電白人正德中知上思州修理城池鼎建學

校優於才能以薦調知橫州尋以親老乞致仕

舊志

屠堯字文治平湖人正德間巡按廣西徭寇方熾

歲饑特甚堯設法轉運增價招商多所全活

浙江通志

章諍太湖人正德間知全州清節自持和平無擾

得士民心轉廉州同知送者塞於途

舊志

宗璽字朝用建平人正德間為按察使練習文法

吏不容奸訟獄至前數語而決

舊志

黃衷字子和南海人正德間以胡世寧薦遷參政督糧嚴法繩奸部內警肅大征古田衷率師由洛

容斬級二千餘論功賜金綺晉一階

廣東通志

張祐字天祐廣州人正德中進署都督僉事鎮守廣西督都指揮沈希儀等討臨桂灌陽諸徭又連破古田賊俘斬甚多已復討平洛容肇慶平樂諸

蠻上思州土目黃鏐作亂祐購其黨黃廷寶縛獻  
之後王守仁至粵詢以撫勦之宜祐曰以夷治夷  
可不煩兵而下守仁納之蘇受果效順因命祐部  
分其衆事寧守仁言思田初定宜設一副總兵鎮  
之請卽以命祐報可祐通識古今馭軍有節制能  
與同甘苦不營私產每載書以隨嘗謁伏波祠太  
息謂沒當俎豆其間及卒田州人立祠槿山祀之

節明  
史藁

王啓字景昭黃巖人正德間為逆瑾誣謫知容縣  
後陞布政使世宗登極與右參政黃衷奏言廣西  
稅糧初四十二萬有奇頃以人民逃散及土官不  
服輸納歲實徵止二十三萬有奇而宗藩及官軍  
祿糧且過三十五萬將何以支上命發鹽銀五萬  
兩濟之初中官鎮廣西歲以零陵香進上雖詔却  
諸獻而廣西徵貢如故至是啓請罷之仕終副都

御史

舊志

石希介成都人正德十四年令岑溪性慈惠勞心  
撫字築外城以奠民居嘗欲鑿瀧水以通舟楫因  
改任未果百姓思之

舊志

吳子堅潮陽人為宣化教諭每升堂論學首嚴義  
利之辨多正言格論以啓悟諸生遇貧寒分俸以  
周卹之疾則親為餽藥嘗植松於東西齋日夕自  
灌以種樹為種心授學者以勿忘勿助之法嘉靖  
中遷慶遠教授宣士建植松亭鐫石以識去思

舊志



楊必進字抑之吉水人正德間出為廣西按察僉事遷副使先是猛獁居險阻多賄吏士為耳目合兩廣聚兵攻古田鳳凰寨三月不下必進猝至其地閱獄出囚之壯者二百人許其自效陰部勒之夜分篝燈火自間道入斧木仰登出寨後焚其巢諸司夜見寨火爭踴躍相賀及明見諸囚出詢故始媿謝不及蓋必進未嘗與軍事也都御史蕭翀因以府江兵備薦必進謂府江箐密道遠不可驟

以兵入首以恩信結其心始諸猺疑其言問出數  
十人嘗試之必進召之堂下言語煦煦比遣歸遺  
之醪肉或巾幘其後稍稍率諸猺婦來見其夫人  
夫人又食以糈餌以少針線女紅分給之諸猺婦  
出其夫咸感激誓死不敢背德

獻徵錄

張嶺字時俊蕭山人正德十六年以右都御史總  
督兩廣軍務上思州賊黃鏐殘破州縣討擒之嶺  
賞罰明信尤痛懲貪墨吏後掌南京都察院事

節舊

志

王濟字伯雨烏程人正德十六年授廣西橫州判官比莅州州方缺守既攝篆視事盡得其俗之習尚政之利弊召父老庭下集議可否而從革之於是民知嚮方盜亦潛息俗用丕變其風土物產之尤異者輯錄一編曰日詢手鏡後以養母乞歸州柯良晉湘陰人嘉靖元年知武緣縣操守廉潔俸俸外秋毫不私入疑訟一訊立辨又加意育才士

知嚮學

參舊志

胡堯元字廷獻蒲圻人嘉靖元年以預平宸濠功授廣西右參政洛容邑為賊陷幾廢堯元復之建桂林書院買田擇師以董諸生田州酋岑猛怙亂為暴其黨劉召誘謀復思思土官岑權巡撫張嶺命兵備副使鄧炳等討之不利執都指揮孫震曰必復土目退官兵乃還鎮衆議釋召堯元曰若是召必擁震而入思思計晚矣乃條酋罪狀白當道

諸帥難之不從召果以震去巡撫盛應期乃以討賊事屬堯元堯元進兵擒賊將李隆禮陸利廣脫其縛結以恩信使執召贖罪自是餘賊多附堯元乃深入東蘭那地金城經畫疆理宣布朝廷威德還是年巡撫姚鏌疏請討猛鏌問計堯元曰岑施王達為猛失其職守怨猛深今若許其立功還故職則二人樂用且使人聲言兵十萬取田州猛必專意泗城乃使思思堅壁別以遊兵劫其村落令

猛左顧以禦思恩南寧武緣各整兵旅待湖兵至  
夾攻之三面受敵賊必窮蹙歸順者猛之南屏也  
所親在焉猛急必循歸順趨交趾若陰使人以啗  
吮之事必集鎮遂檄堯元監軍賊將陸綬猛子邦  
彥素驍勇堯元帥兵進攻截斬陸綬走邦彥猛謀  
出奔猛婦翁歸順知州岑璋先是堯元令沈希儀  
等察千戶趙桓雅善璋遣桓抵璋因得與猛相仇  
狀說璋擒猛自效及猛敗璋乃使人招之曰事急

矣願主君走歸順三四夕可至交趾猛從之堯元  
以兵萬人壓歸順璋給知猛印所在即斃死猛而  
斬其首并佩印送軍門所分兵復斬賊將玉林等  
事平堯元冒瘴死復蘇猶口授諸將兵事一十三  
條疾遂篤至橫州卒巡按石金疏其死國事乞贈  
官立祠以祭從之

節舊志

高友璣字肅政樂清人嘉靖初以廣西參政管田  
州府事田故夷方險地土官岑猛者坐與族類構

爭削秩詔以漢官撫之衆以蠻性叵測為友璣危  
友璣曰臣子委身之日也單車入境宣朝廷威德  
示以順逆利害猛遂聽命友璣立學訓士置堡伍  
聯其衆歸被虜男女以數百計田人帖服不煩兵  
而寇寢事平活千萬人之命聞於朝宥猛且復其

官

獻徵  
錄

李中字子庸吉水人嘉靖初任提學副使守官廉  
以身為教擇諸生高等聚五經書院講難不輟

舊志



汪淵江西上饒人嘉靖間巡按廣西會有猺獞之變淵至行鵬勦法擇嚮道授之機宜一鼓搗桑江十三寨巢穴盡斬其首惡餘黨悉定乃諭以威信修洛容縣以治之猺獞各感泣爭致材木助役人以為得其死力擢大理寺丞後姚鏌奏岑猛之捷謂淵按廣西時首發其奸又詔賜白金文綺

舊志

黃澣字德新廣東澄邁人嘉靖二年知北流縣剛介不避權要邑為弊政所苦民多流徙澣招徠安

集復業者無算卒於官篋筭蕭然

舊志

周墨太倉人初官刑曹以忤劉瑾謫譴嘉靖三年  
遷左州知州州環介諸谿尚蠻獠復值田州岑猛  
縱亂流害郡邑凋敝特甚墨加意撫循開田鑿井  
築城建學立祠祀馬援張柬之蘇緘鄒浩諸賢以  
風厲土俗州嘗有虎患墨告誓於神越日虎自投  
城下格殺之後卒於官州人追思不忘

府志參  
一統志

姚鎮字英之慈谿人廣西提學僉事創宣成書院

延經師以造士子桂人祀山魃卓旺鑊毀其像俗  
遂變嘉靖五年復以右都御史提督兩廣軍務兼  
巡撫田州土官岑猛叛鑊令都指揮沈希儀等統  
兵八萬分道討而鑊與總兵官朱麒等攻破定羅  
丹梁復破猛子邦彥於工堯隘猛奔歸順岑璋誘  
而醜之斬首以獻鑊請改設流官陳善政七事制  
可乃命參議汪必東僉事申惠與參將張經以兵  
鎮其地甫至猛黨盧蘇王受等詐言猛不死借交

陟兵二十萬且至夷民信之蘇等薄城經突圍走  
城遂陷王受亦攻入思恩府鎮將大討之會廷議  
起王守仁督兩廣軍令鎮與同事鎮引疾乞罷許  
馳驛歸鎮方候代千夫長韋貫徐伍攻復思恩鎮  
上狀詔先賞貫等而以撫勦事屬守仁處置家居

數年卒

舊志節  
明史彙

劉穎字時秀臨川人嘉靖初命盤查湖廣廣東西  
時田州土官岑猛殺官奪印降璽書委穎督勦以

都御史姚鏌提督軍務穎慮數十文員無以克敵  
疏請分領騎將如所奏時岑猛與韋好周俊統目  
兵駐田州猛子邦彥等駐兵工堯岑理駐歸迎其  
他賊將分駐各要害以拒敵嘉靖五年五月穎同  
總鎮中官鄭潤都御史姚鏌總兵撫寧侯朱麒集  
兵十萬餘為五大哨以副總兵王偉參將張經李  
璋都指揮沈希儀指揮施震等分領其軍六月擊  
工堯斬陸綬邦彥遁去猛聞乃自將銳甲陳於馬

平官軍奮擊賊大潰猛棄城遁欲走交趾歸順州  
土官岑璋誘猛殺之函首軍門仍分兵掃捕餘黨  
俱授首併獲猛第三子邦輔四子邦相而邦彥亦  
竄死於齊村破巢砦九十五處斬首四千八百餘  
級生擒賊屬男婦一千七百餘人穎上疏報捷復  
陳處置事宜四事一專設守備一存立城頭一興  
復學校一酌處奉議降敕旌獎時諸將議欲撤兵  
穎與姚鏞書條列其不可狀言甚悉

載藝文志穎後復

陳撫恤瘡痍八事俱報可尋以母病乞歸

節舊志

陳堯思吳江人任永安知州嘉靖五年攝橫州時  
有思田之師都御史姚鏞駐節橫州三省官屬供  
費繁冗堯思出庫銀大小作數百封鈐印親給謹  
擾不作民心稍安省里甲科派革吏書弊修學圮  
廢助士之貧者州人至今思之

舊志

林富字守仁莆田人嘉靖中任廣西參政廣西糧  
儲素乏富勾稽審覆盡釐宿弊後陞廣東布政使

為忌者所中調廣西時岑猛麾下盧蘇輩結思思  
遺孽王受仍為亂王受掠至膺墟將進逼武緣富  
決策部分諸將且覘知受空城出密遣將徑趨思  
思先克其穴賊勢既挫乃議撫王守仁至論事頗  
合遂下命撤兵蘇受率衆七萬來降田役罷朝議  
欲改土設流富謂思思仍流官田州土官必不可  
廢遂行其議

舊志

王守仁字伯安餘姚人嘉靖六年思思田州土酋



盧蘇王受反總督姚鏌久不克乃詔守仁以原官兼左都御史總督兩廣兼巡撫守仁在道疏陳用兵之非且言設流官之誤及至南寧蘇受遣使乞降守仁令詣軍門諭二人薄杖而釋之親入營撫其衆七萬奏聞於朝陳用兵十害招撫十善因請復設流官量割田州地別立一州以岑猛次子邦相為吏目署州事而於田州置九巡檢司以蘇受等任之并受約束於流官知府帝皆從之斷藤峽

猺賊上連八寨下通仙臺花相諸崗蠻盤亘三百  
餘里郡邑罹害者數十年守仁欲討之故留南寧  
罷湖廣兵示不再用伺賊不備進破牛腸六寺等  
十餘寨峽賊悉平遂循橫石江而下攻克仙臺花  
相白石古陶羅鳳諸賊令布政司林富率蘇受兵  
直抵八寨破石門副將沈希儀邀斬逸賊盡平八  
寨條陳八寨五屯善後諸策守仁去後猶見施行  
隆慶初贈新建伯諡文成賜葬

明史  
葉

蔣山卿字子雲儀真人知潯州時會征思田南寧  
為襟喉官兵四集饋饟亟劇調知南寧張約束調  
轉輸居民安堵軍需克濟及事寧制臣議設思田  
為流府欲割思龍以附之山卿力沮之曰此割肉  
補瘡也是其議改思龍為隆安縣陞本省參政舊志  
華愛字仁卿鄞縣人由南京兵部職方郎中出知  
桂林府桂林獷而好訟克斥於獄有久繫不決者  
愛聽微折疑窮日力不懈決旬囹圄為空時田州

岑猛梗王化督兵征勦迅檄趣軍餉而桂林逋負以百萬計愛早夜區畫與民裁省輸餽每為鄰壤

先

獻徵錄

李如圭澧州人嘉靖初府江兵備副使以名節風勵邊俗振綱肅紀吏治為之澄清時猛賊猖獗征勦之暇加意學校

舊志

鍾天爵武平人嘉靖間任平樂推官自桂梧路梗條上八議當道採用之又領兵破斬賊千餘級署

富賀二縣立屯堡練鄉兵昭州以寧

福建通志

陳煥字子文餘姚人歷官曹郎陞廣西右參議分守柳州猺獞出沒為患參將沈希儀領兵界上欲誅之煥謂之曰猺不可盡不如以恩信撫之遂與希儀入其境召諸酋長更為約不犯則賞之諸酋長大悅聽令竟不犯柳州

獻徵錄

劉士奇字邦正順德人嘉靖七年知梧州仁明廉

恕庭無留獄字民惟恐傷郡故多竹舍連歲罹火

患出帑金為民築牆垣以避火吏收支多侵牟者  
為較正法馬後遂按為格嘗刻定性書揭理學本  
源以變化多士民有盜庫銀者訊不服立命搜出  
之發奸摘伏合郡肅然累官山東布政使

舊志

甘秉倫廣東博羅人嘉靖初任賀縣教諭因才責  
成士樂其教間有從師講學者必津送而助給之  
手植雙桂於明倫堂之前合抱盛開人目之曰甘

桂

舊志

桂鏊字傳之貴池人嘉靖間任柳州府同知尋擢  
守思恩府有文武才王守仁奏遷府治於荒田驛

經營開創半賴於鏊郡人祠祀守仁鏊配焉

舊志

李寅字敬之縉雲人清廉鯁直歷官多治績嘉靖  
間任布政使時應得羨餘一十三萬悉以解部及

歸行橐蕭然

浙江通志

方紀達字行可歙縣人嘉靖八年遷廣西僉事既  
至值田寧用兵之後出謀發慮動合機宜如思恩

之徙治荒田思龍之不割附田州皆有力焉加意撫恤民賴以生及卒無殯殮貲僚屬合賙收之

舊志

王顯高四川綿州人嘉靖初為慶遠知府剛介嚴明積弊冗費一切裁之奸宄斂跡境內肅清南丹等州猛蠻桀驁痛懲之而復其侵地土目韋正西盜三寨巡檢司印計擒誅之尤加意士類新學宮復書院擢本省兵備副使

舊志

黃佐字才伯香山人嘉靖中提督廣西學政修書



院撤淫祠行射禮舉節孝立鄉社擇土民及犷獷  
之子弟教之風化大行以舊通志闕畧發凡舉例  
為圖經為表為志為列傳為外志總六十卷佐學  
以程朱為宗惟理氣之說獨持一論平生撰述至  
二百六十餘卷所著樂典自謂洩造化之秘穆宗  
詔贈禮部右侍郎諡文裕

舊志

宋子平字衡甫建寧人嘉靖間官南丹衛經歷地  
近苗多盜弭禦有方署賓州篆不俟報發倉賑饑

擢賓州判值水災請停徵以甦民困

福建通志

顧遂字德伸餘姚人嘉靖庚寅遷廣西副使兵備賓州等路賓地錯犴犵剽掠出沒民甚苦之遂至親歷險峻知岷谷委曲狀遣兵投方畧縱火焚其林薄又多築城堡據扼要害賓氓以寧遷右參政分守思思方土目為亂勢甚猖獗遂親督行陣斬獲酋首又與諸同事議者曰使賊畏我而退不若悅我而服也乃單騎之界上招其餘黨諭以利害

結以恩信皆羅拜歡呼願聽約束撫按論功以聞

賜金帛勞之遷貴州按察使

舊志

陳璇字治之廣東揭陽人嘉靖中任靈川教諭立教以身率先登堂課士無一日少輟貧者則助給之修學校毀淫祠常捐俸築牆於明倫堂前自遷

學後科第始盛

舊志

唐胄字平侯瓊山人嘉靖初遷廣西提學僉事令土官及猺蠻悉遣子入學屢遷廣西左布政使官

軍討古田賊久無功曾遣使撫之其魁曰是前唐使君令吾子入學者即解甲

舊志

方鵬字時舉懷寧人戶部郎中嘉靖十四年謫任永淳縣廉毅有為留心撫集政暇親課諸士修學宮闢書院教化以興

舊志

錢嶸字君望江南通州人嘉靖間巡按廣西諸所收治不旁寄耳目間屏騶從或之倉庫或竟入獄閱其弊孔即日披抉舉快人意靖江侍衛軍校榮

惑王聽喋捕而斃之獄國人帖然

舊志

沈垣字子定清溪人嘉靖中奉璽書錄囚廣西出

寃民劉榮等七十餘人不為法縛亦不利法

舊志

蔡經字廷彝侯官人嘉靖十七年進兵部右侍郎

總督兩廣軍務斷藤峽賊侯公丁據弩灘為亂經

與御史鄒堯臣等定計誘執公丁參議田汝成請

乘勢進討命副總兵張經將三萬五千人為左軍

翁萬達監之指揮王良輔等六將分六道會南寧

都指揮高乾將萬六千人為右軍副使梁廷振監  
之指揮馬文傑等四將分四道會賓州抵賊巢夾  
擊賊奔林崗良輔等邀之賊中斷復西奔斬首千  
二百級其東者遁入羅運山萬達等移師攻之檄  
右軍沿江而東繞出其背右軍愆期田州土酋盧  
回乃縱賊去俘其衆四百五十招降者二千九百  
有奇又平思恩九土司進兵部尚書

明史  
葉

翁萬達字仁夫揭陽人嘉靖中為梧州知府仇鸞

鎮兩廣縱部卒為虐萬達縛其尤橫者杖之鸞為  
斂戢閱四年聲績大著會朝議將討安南擢萬達  
廣西副使專辦安南事萬達請於總督蔡經曰莫  
登庸大言中國不能正土官弑逆之罪安能問我  
今憑祥州土舍李寰殺其土官珍思恩府土目盧  
回煽九司亂龍州土舍趙楷殺從子燧煖又結田  
州人韋應殺燧弟寶斷藤峽猺侯公丁負固此曹  
同惡共濟一旦約為內應我且不自保曷先擒此

數人問罪安南易下耳經然之於是誅寰擒回招  
還九司誘殺楷佯繫訟公丁者給公丁執諸座以  
兩軍破平其巢又議降肖豪黃賢相登庸始懼會  
獲安南諜者丁南傑萬達解其縛厚遣之休以天  
朝兵威登庸大懼詣鎮南關乞降毛伯溫等承制  
許之萬達功最賞不逾常格然帝知其能兩為軍  
務尚書隆慶中追諡襄毅

舊志

田汝成字叔禾錢塘人嘉靖中分守右江龍州土



酋趙楷憑祥州土酋李寰皆弑主自立與副使翁萬達密討誅之弩灘賊侯公丁與斷藤峽羣賊相應汝成復偕萬達設策擒公丁而進兵討峽賊大破之又與萬達建善後七事一方遂靖凡有兵事皆萬達謀而汝成決之績甚著汝成居官公餘必展書史嘗語人曰對此佳思自集雖聽斷有檢式非但多聞而已尋遷福建提學副使

舊志

陸銓字選之鄞縣人任廣西按察使時弩灘羣賊

雜處胡藍二姓間相助為寇或議大舉兵盡殲之  
銓曰不若討渠魁而釋其餘戎帥是其言弩灘果

平

獻徵錄

江一桂字白石新安人嘉靖間任太平守諭降莫  
登庸築受降城建昭德臺於鎮南關以壯邊防及  
卒諸夷創枕椰祠於關內祀之

舊志

曾存仁字懋遠吉水人嘉靖間以參政典糧餉交  
南罷役會計所費廣西應償廣東金穀若干東徵

乃甚支吾強輸其半存仁密白之軍府請緩征用  
卹西因為便從之兩江數經兵火田棄不耕者萬  
餘畝存仁行視其處督附近官吏及時召募開墾  
又為指示左右溪澗可疏引及陂塘可修復者以  
次舉行後稍徵入佐給征戍焉

舊志

萬潮字汝信進賢人嘉靖間為左布政使整肅有  
度諸郡縣所遣輸金至者令各操金以次當前執  
法馬以自較報曰已如數乃目司庫覆視無異即

給批遣之去吏白批過期久請治朝曰此中山徑  
水道恒苦諸蠻朝嵐暮靄足生瘴癘安知來者不  
以此中阻乎但所輸不虧足矣潮禁司庫官吏勿  
得輒離庫時遣視違必撻治之遭喪去右使夏邦  
謨代行藩事悉循潮法或曰盍少寬邦謨曰財幣  
之府何可不慎吾見萬公寬非嚴也卒與萬齊名

舊志

朱鴻漸吳縣人嘉靖十八年知梧州出納必親奸

胥不得售其蠹輸羨餘以資公帑修葺學舍躬勤課講時征交南兵過境注措有方民不知兵累官

福建布政使

舊志

李義壯字稚夫番禺人嘉靖初為廣西提學嘗攝臬事革藩府守衛之亂法者明慎持憲獄多平反

時稱廉明

舊志

吳世澤連江人嘉靖間以副使分飭府江風裁廉潔剔吏蠹端士習復流移通商賈諸蠻賊隸府江

者故多桀鶩為患世澤整兵耀武嚴為之備而以  
德懷之不數月猛蠻相戒無敢犯境諸鄰尚復業

者千餘家江道肅清

舊志

李文貴嘉靖間為賀縣教諭勤以勵已嚴以教人  
以舊學不利科目捐金遷建於南門內賀士遂連

魁其鄉

舊志

郭顯文江西泰和人嘉靖間方士獻修煉術營建  
道宮顯文抗疏極諫謫吳川典史二十二年遷北

流知縣釐正宿弊行保甲盜賊屏息

舊志

潘鑑字希古婺源人嘉靖二十三年總督兩廣性

平易而耿介不可以私干治官如家廉慎之操始

終一致卒贈太子少保

舊志

張岳字維喬惠安人嘉靖初提學廣西時行選貢

法相張璉主其議選無論廩次輒取年少有文者

岳謂邊遠士雜夷風縣久不科目予貢使其以衣

冠人物別於夷所以漸變之也絀不如璉指璉因

黜廣西選貢七人謫岳廣東鹽課提舉遷知廉州  
府久之進右副都御史總督兩廣軍務兼巡撫平  
馬平諸縣猺賊先後俘斬四千招撫二萬餘人誅  
賊魁韋金田等又連山賊李金與賀縣賊倪仲亮  
等出沒衡永郴桂積三十年不能平岳大合兵討  
之賊渠授首益鎮四年巨寇悉平召拜兵部侍郎  
尋陞右都御史卒贈太子少保諡襄惠岳博覽工  
文章經術湛深不喜王守仁學以程朱為宗

舊志



吳源字宗乾錢塘人嘉靖中累遷廣西按察司僉  
事時總督張岳負才望察吏少當意及見源獨折  
節下之入參謀畫出董師旅屬郡劇寇掠人妻以  
邀厚贖官兵不能制源用間擒之并滅其黨民賴  
以安改江西副使陞按察使

舊志

翁世經字可直福清人嘉靖二十四年知梧州治  
尚節簡約已裕人加意學校平衢道修府庫立三  
關寨百廢俱舉秩滿去闔郡思之

參舊志

王時中字執之閩縣人嘉靖二十六年任橫州存  
心愷悌政尚廉平斷獄多從寬恕愛惜民財簡於  
承奉振興士類每月給膏火率以為常後乞養歸

參舊  
志

歐陽必進江西安福人嘉靖二十七年總督兩廣  
軍務故事軍餉解軍門必進令入梧州庫移文動  
支以謹出納時南丹州官之族偽稱岑韋串田州  
土目逐主母瓦氏乃發兵誅斬田州以寧

舊志

王宗沐字新甫臨海人嘉靖間任督學行部徧試歸檄諸生會宣成書院論學不徒校課文藝且令

反求本心士多啓悟

舊志

郭時斗字文起蘭谿人嘉靖間擢潯州府推官多所平反潯錯徭盜窟宅武弁冒功縛良民二十四人為盜制府梟其二斃於獄者四時斗廉實其枉白之監司申請盡釋其餘五指山剽賊韋公廩結連諸崗入寇時斗密募忠勇授以方略盡行破滅

浙江  
通志

徐南金字體乾豐城人嘉靖間按粵西廉知靖江  
諸軍校熒惑王聽惡氛甚熾遣官卒就府中縛出  
以狀列奏逮治如法自後無敢指稱侍御親近陵

暴其國人者

江西志

劉陶廬陵人嘉靖二十九年知蒼梧縣廉潔而嚴  
時民任館庫里甲之役蒼梧當孔道措辦無休日  
陶獨毅然絕交際即歲時於上官無私覲聽斷明

允不以權勢骫法過攢造躬較版圖盡剔諸弊民

賴以蘇

舊志

魏一恭字道莊莆田人嘉靖間督廣西學政歷轉  
左布政知民積苦向時科出顧役金錢者汰其半  
如均徭榜數不則收治之州郡奉令謹察諸役無  
敢倍取後有同官陰詆於御史謂一恭營私亡何  
一恭卒御史弔畢突入檢視裝篋一無所有問其  
家童對以俸錢並在庫隨叫主藏官吏至具對如

前御史嗟嘆乃書其治行檄郡為主奉祀名宦

舊志

應欖字傲我遂昌人嘉靖三十年以兵部侍郎總督兩廣軍務時桂平諸徭恣為剽寇而莊頭鬼子等巢諸賊為甚欖密委僉事茅坤以討賊事不旬

日破十五巢斬獲二百有奇府江少戢

舊志

茅坤字順甫歸安人屢遷廣西兵備僉事轄府江道坤雅好談兵徭賊據鬼子諸巖殺陽朔令朝議大征總督應欖以問坤坤曰大征非兵十萬不可

餉稱之今猝不能集而賊已據險為備矣計莫若  
鵬勦條入殲其魁他人必讐謀自全此便計也櫛  
善之悉以兵事委坤連破十七巖晉秩二等民立

祠祀之

舊志

潘恩字子仁上海人嘉靖中提督廣西學政增益  
藝文所先者啓之而其要歸在於敦本實貴器識  
時靖江王勒其衛卒之子弟毋得充諸生而試者  
必以賄恩移文長史諸生乃獲試又嘗署按察篆

勾捕王所匿大猾必得乃已考最進四川布政司  
左參議後以左都御史致仕萬曆初賜存問卒年  
八十七贈太子少保諡恭定

舊志

張元藩浙江山陰人嘉靖中知平樂府時江南苦  
倭徵發連數省而郡境犴獍竊發兵餉不支勦撫  
無定議元藩與僉事茅坤謀曰今朝廷方有東顧  
憂何暇及此惟公便宜除其首惡餘黨自平坤乃  
定鵬勦之策賊首莫良三藍孟乾等次第受縛闔



郡晏然

參府志

許應元字子春錢塘人嘉靖中累遷廣西按察副使  
使獐夷數侵惡應元為上三議曰責田主嚴罰格  
更旗軍大畧主守隘護田使蠻無所奪食以自困  
也又攝兵府江巨獐莫氏兄弟三人以驍勇時嘯  
聚為鄉邑害應元設方畧誅之江道底寧

參舊志

秦檜知慶遠府嘉靖中有永定土司韋繼祖及其  
子啓邦皆驍捷過人嘗率賊三百餘夜入府署殺

數人劫官帑數千金出人衆莫敢櫻知府閔旦以  
上計去郡事遂寢自是粵西暨鄰省往往盜藏庫  
獲賊鞫訊咸列啓邦父子姓名歷任守皆不敢發  
會檉至謁軍門首以是委之檉不動聲色各土司  
承檉來謁多待以禮貌啓邦莫測檉意又以歲久  
事已守新任不能遽察遂挺身出檉一見大喜獎  
勞訊其技能益佯喜厚犒且許薦之啓邦出望外  
由是往來頗數一日檉密計召啓邦至懷遠候分

都亮地先伏壯士於兩廂啓邦入突出縛數前罪  
斬之並斬其隨行五十人懼恐餘黨震動即下令

安插檄啓邦妻莫氏代理永定帖然

訂府志

譚大初字宗元始興人任廣西參政桂林澇米價  
騰貴請督撫開倉發糴便宜賑恤存活以十餘萬

計子音以貢歷上石西州知州亦有廉直聲

節獻徵錄

金傑浙江澇溪人嘉靖三十二年知富川縣潔清  
自持勤恤民隱會澇溪寇起傑定計勦之賊大挫

而遁嗣是諸崗巢不敢動境賴以寧

舊志

劉教字道夫廬陵人嘉靖三十三年知梧州府有  
清操裁一切供億冗費以行義見重於時魏一恭

譚大初雅尚風節亟稱之

舊志

章美中字道華常熟人累遷廣西參議盜陷太平  
諸郡美中先諸道兵收其衝捕虜酋百餘設伏夜  
搗賓利猛降之土兵當調發禦倭美中戒毋後期  
後期有法又戒吏毋尋前例受賕受賕有戮兵吏

交惕息無敢違嶺東譚大初與美中治廣西後先得代廣西士民謳思之曰譚公為政若霜日章公

嗣之守畫一其見服於人實相類也

獻徵錄

陸敷錫字得承嘉善人嘉靖中判柳州署象州事象有安仁土舍何公思等聲言花蘆古陳諸賊稔亂殃民願効死力為朝廷除害其實陰肆殺掠洛田陸弄間良民率被魚肉乃各聚衆相攻殺敷錫請往諭之至則獨坐公思開釁罪餘黨悉解去象

州以平又王守仁所復斷藤八寨多為逋逃數數  
錫相度要害上當道移置衛所凡十九由是盜賊

失據尋以將母乞歸

粵西  
文載

周于德字南墩淮安人襲大河指揮嘉靖間軍功  
歷陞廣西鎮守精勤明肅值犛獠久亂撫勦多功

地方感之祀崇報祠

江南  
通志

章熙字世曜海陽人嘉靖中以按察司僉事分巡  
蒼梧多所釐舉白馬三洲故險道也江道逶迤林

木深阻諸蠻久窟為患熙至下令調集諸路營兵  
統以偏裨而躬履其地度其地勢高下而隨刊之  
盡伐其樹赭其山分兵守焉自是諸蠻不敢復出

參舊  
志

陳堯字敬甫通州人嘉靖中轉廣西督糧參政廣  
儲倉弊孔故多悉廉得其狀逮諸飢法者置之理  
不踰月弊清後為左布政使務從大體不事繁苛  
有司間挂一青輒念遐方卑秩良苦寬之使自新

司帑度支條為會計書稔然可按無敢有闌出扞

文罔者靖藩諸宗率不請名封已食采祿堯一切

劑以甲令格不予後入為刑部侍郎母老乞歸

舊志

楊鈞雲南人嘉靖三十五年任恭城縣政尚公平

見學宮不利於科名乃捐俸申請遷建縣治之西

南隅嗣後人才蔚起申禁通關以免供應并詳豁

本色胖腴改折皮張銀兩勒三大興革事於石

舊志

王鈞字子宣會稽人嘉靖三十六年總督兩廣兼



巡撫緝盜安民地方寧謐先是督撫自置賞功所  
凡金錢出入無敢覈者鈔改貯梧州每有犒賞移  
文給之出納有稽嫌疑不作而軍儲亦漸盈雄梧

二府稅錢舊資軍餉及是皆罷輸之北邊

獻徵  
錄

張冕字莊甫晉江人嘉靖間為桂林同知時宗藩  
暴橫殺僕圖賴冕力折之又覈陽朔糧額清詭沒  
以盡復舊全州差役以吏承冒免者歲數百人而  
役歸貧民冕嚴為之裁賦役為均查梧州倉糧舊

額倉儲五萬皆輸自東粵事屬兩省難稽奸徒藉  
此為市冕悉廉得之而酌其所侵之久近以論罪  
輕重人服其明後擢撫夷僉事桂林城故有敵臺  
冕補以望樓而徙窩舖以便巡守築石關以護居  
人擇諸要害設堡戍兵俾哨守相望覈二衛軍與  
募卒選丁壯者編隊教練而時自抽閱兵備以肅

節舊  
志

趙塤字平仲餘姚人性故清介人不敢干以私號

趙鐵面嘉靖間為廣西僉事分巡桂林不事檢攝其門閭若無人者及聽兩造率以情斷經其庭者

無寃民

舊志

陳道基字以中同安人嘉靖間巡按廣西時邊徼諸吏類多闡茸道基下車按其尤無良者墨吏望風解綬去行部所至詢民疾苦銳為興革尤加意造士後為布政司參政拊循益力會城西南河流舊故橫溢為築橫橋而東之與離江會公私交賴

搖蠻聞其名咸相戒無犯

舊志

李鵬舉歸善人嘉靖三十九年判梧州政務嚴明人不敢欺革釐倉弊解戶無虧公暇進諸生講心性之學署容縣懷集縣增置學田造士養民多善

政

舊志

陳暹字德輝閩縣人嘉靖間為參政恬淡有守曾攝藩事司庫以羨餘進暹署字封識貯存為司公費及陞去以前金贖卒不受

舊志

翟宗魯字一東博羅人嘉靖間知融縣剛毅有守  
緩征輸節財用復廢學地租每日必告天而出聽  
訟片言立剖十二肖徭來寇設師禦諸郊賊以牛  
前行忽震死懼而退宗魯乃身詣賊營諭以禍福  
咸聽撫又奉檄轉饗中道賊百艘遮迎謀知翟縣  
君亦投戈而去宗魯擇諸徭子弟稍慧者被之青  
衿鉦鼓導歸諸徭以為寵率皆嚮化人謂一賢令  
勝十萬師考最乞歸

廣東通志

黎民衷從化人嘉靖間官參政代藩使篆古田賊  
韋銀豹等夜越城劫庫衆莫敢格民衷升堂就坐  
銀豹等直前害之追贈如典

舊志

鄭一龍字于田惠安人嘉靖間為按察司撫夷僉  
事時古田不靖作撫夷通論一日嚴緝事二曰別  
蠻情三曰禁招主四曰誅賊脚五曰謹巡哨六曰  
明賞罰七曰防寇有時八曰勦賊有引著為功令  
施行自是盜賊斂跡後為副使兵備右江至則申

約束嚴科派偷安騷擾賣放通夷諸弊而密陳制  
府以遷江之東歐來賓之北三北五柳城之上油  
宜山之清潭都亮賓州之淶里橫行流劫收捕宜  
先制府檄守備輩聽一龍指揮分以疆域責令鷗

勦賊甫離巢隨即捕獲羣盜屏息

舊志

吳桂芳字子實新建人嘉靖間分守嶺西以作養  
人材為任四十二年總督兩廣時廣西古田賊方  
熾桂芳度其時未可輕舉遣典史廖元持文告諭

之諸犇聽撫請以元入縣守其地桂芳奏陞元為  
本縣主簿設鎮守廣西總兵官以都督同知俞大  
猷克之後古田成功與有力焉所著有兩廣疏議

師暇裒言

舊志

段雲鴻高明人嘉靖四十三年知賀縣治尚仁慈  
民有訟必開誠勸諭曉以利害捐貲修學建橋士  
之貧而有文行者量資助之

舊志

李遷字子安新建人嘉靖中由湖廣布政司右參



議擢廣西按察使時靖江王與諸宗人相訐事下  
臺臺以屬遷翌日遷往見王王蓄怒而待遷曰大  
王之有國於此乃悼僖王之賢而高皇帝復之也  
今大王挾貴以陵諸宗人諸宗人亦挾衆以抗大  
王舉甘心有司約束而裹足不入王門大王能忍  
是徒擁虛器不忍則與諸宗人之訐無已也一旦  
天子赫怒大王豈獨晏然遷故非為諸宗人也為  
大王也王色動求教遷乃曰大王幸聽遷遷等請

分諸宗人為十餘房房擇一篤行長者長之以懲  
訓其不率重則付之有司月朔必朝見祭必從請  
名請婚則以屬大王大王之貴在而諸宗人亦服  
矣王具如遷議事以解隆慶中累遷兵部左侍郎  
提督兩廣諸軍請平古田之亂上便宜八事報可  
乃調狼土兵十三萬七千人分七哨進攻以總兵  
俞大猷及副參遊諸將軍統之而參將柴淶副使  
邵惟中等監其軍檄湖廣將士固守東安黎平隘

防奔逸申飭軍令嚴賞罰仍戒毋妄殺毋擄財物  
兵進蕩其寨柵六十五黃朝猛戰死韋銀豹窮窟  
餘酋二十二以次就縛斬首萬餘降餘衆二萬請  
改古田為永寧州使監司鎮之其他增將卒置學  
宮選良吏疏上具報可以功進右都御史後以南  
刑部尚書致仕歸卒諡恭介

明史  
葉

莊朝賓字於觀惠安人嘉靖間歷按察副使駐賓  
州去州一舍為賊巢時出剽掠乃議戍守事宜次

第行之又以八寨賊鳩張已久土官韋起雲沈勇  
可任即屬以兵復思思九司巡檢分鎮焉八寨聽

命唯謹人呼為莊菩薩

福建通志

亦孔昭江都人先襲馴象衛百戶嘉靖間軍功歷  
陞指揮僉事從總兵李錫殲破懷遠賊巢又奉令  
討洛容撞斬賊首陶浪金等擢思思參將

舊志

廣西通志卷六十七

欽定四庫全書

史部

廣西通志卷六十八

詳校官給事中臣鄧文泮

檢討臣德生覆勘

總校官進士臣朱鈐

校對官編修臣盧遂

謄錄監生臣王元愷

欽定四庫全書

廣西通志卷六十八

名宦

明

譚綸字子理宜黃人嘉靖四十五年以兵部右侍郎兼右僉都御史總督兩廣軍務兼巡撫隆慶元年冬廣任事招降岑江尙賊江月照等設營扼險以除七山諸寇時荔浦永安之間亂者四起綸檄

總兵俞大猷咨進勦計籌畫甚悉事甫就緒而北  
邊告急復徵還部綸破賊必絕其根株不苟便目  
前雖去廣後代者如郭應聘殷正茂輩悉諄復指  
陳授以方畧綸任本兵復從中贊之故輒有成功  
如洛容懷遠之捷皆綸之力也以功進兵部尚書  
神宗即位加太子少保萬曆五年凌雲翼總督兩  
廣綸授計誅羅旁賊甫奏捷而綸卒贈太保諡襄

敏  
舊志



殷正茂字養實歙縣人隆慶初古田獐韋銀豹黃朝猛反銀豹父朝威自弘治初敗官兵於三厄殺副總兵馬俊參議馬鉉正德中嘗陷洛容嘉靖時銀豹及朝猛劫殺參政黎民衷提督侍郎吳桂芳遣典史廖元招降之遷元主簿以守而銀豹數反覆隆慶三年冬廷議大征擢正茂右僉都御史巡撫廣西正茂與提督李遷調土漢兵十四萬令總兵俞大猷將之先奪牛河三厄險隘諸軍連克東

山鳳皇寨威之潮水廖元誘獐人斬朝猛銀豹窮  
令其黨陰斬貌類已者以獻捷聞改古田為永寧  
州設副使參將鎮守建委官運鹽之議以其息充  
軍餉綜理詳密軍需賴以不匱終明世增損其法  
而行之卒莫能易會僉事金桂捕得銀豹正茂因  
自劾詔磔銀豹京師置正茂不問尋代遷提督兩  
廣軍務會廣西巡撫郭應聘亦奏平懷遠洛容猛  
正茂以功累加兵部尚書

明史

俞大猷字志輔晉江人嗣世職百戶嘉靖十四年  
除千戶守禦屢以軍功為廣西總兵官故事總兵  
兩廣者一勛臣為之帝用給事中歐陽一敬議兩  
廣各置大帥乃罷勛臣而以大猷為總兵鎮廣西  
先是古田獐黃朝猛韋銀豹等嘉靖末嘗再劫會  
城庫殺參政黎民衷於是巡撫殷正茂徵兵十四  
萬屬大猷討之分七道進連破數十巢賊保潮水  
巢極巔攻十餘日未下大猷佯分兵擊馬浪賊而

密令參將王世科乘雨夜登山設伏黎明礮發賊  
大驚諸軍攀援上賊盡死馬浪諸巢相繼下斬獲  
八千四百有奇百年積寇盡除進世廕為指揮僉  
事後遷福建總兵官乞歸卒贈左都督諡武襄明  
藁

黃應甲字汝第懷寧人少諳韜畧嘉靖間屢遷指  
揮僉事制火器造戰艦皆出心裁古田賊久叛侵  
奪縣治巡撫殷正茂請於朝督師進討應甲乃創

議分七道進其三厄最險身自任之出奇搗虛大

兵遂得入隘俘斬萬計

江南通志

鄭舜臣上虞人由袁州府同知擢柳州太守時督撫大征古田調狼兵十餘萬屯城下各無統屬時聚夥搶掠民苦而訴之當事恐激變計無所出舜臣謀於兵道密遣人擒四人磔於市不書姓名各營自相疑阻其患遂息監軍發俘囚數百名覆審內有幼者六十餘人舜臣憫其無知就死曲生之

節獻  
徵錄

唐執中昆明人隆慶初除修仁令值古田賊勢猖獗方興師大創之檄執中佐軍需大軍深入轉餉無乏賊平遂遷為永寧牧是時賊魁雖已授首然諸獍新附猶鴛鴦不馴或嘯聚剽掠執中輒發蹤殄滅之凡城池公署修廢舉墜四境荒蕪中文復里畝招集流亡俾民皆安其業乃復設學校延社師選諸獍童稍秀者列之青衿時人比之文翁云

任三年轉郡丞去

舊志

郭應聘字君賓莆田人隆慶中由郎中出知南寧  
累遷廣西按察使尋晉右布政使忠州桀夷黃賢  
相與思明蠻爭地應聘密授兵備譚惟鼎計擒賢  
相會巡撫殷正茂遷總督遂擢應聘為右副都御  
史代之首奏以忠州四都地建新寧州以終前功  
有府江徭者上起陽朔下達昭平諸徭夾江而居  
怙險剽劫成化正德間都御史韓雍陳金討平之

至是復反攻圍荔浦永安劫知州楊惟執指揮胡潮應聘會正茂聞於朝集土漢兵六萬令總兵李錫進討未行而懷遠徭亦殺知縣馬希武反應聘與正茂議先征府江三月悉定乃檄錫討懷遠天大雨雪引兵還懷遠古牂牁地界湖貴靖黎諸州嘉靖中征之不克知縣寄居府城遙示羈縻而已時希武見殺師出無功於是應聘益調諸路兵鎮撫白果黃土大梅青淇崗獐以孤賊勢錫與諸將



連破賊斬其魁懷遠乃下而陽朔金寶嶺賊亦定  
乃分遣諸將門崇文等討洛容上油邊山五叛徭  
悉平神宗大悅進兵部右侍郎巡撫如故萬曆二  
年召為戶部右侍郎尋以憂歸八年起改兵部仍  
撫廣西時十寨初下應聘與總督劉堯誨奏設三  
鎮隸賓州以土巡檢守之而統於思恩參將十寨  
遂安拜兵部尚書引疾歸卒謚襄靖

舊志

馬希武隆慶五年知懷遠縣當苗徭蹂躪之後遍

撫諸崗民稍復業乃議城舊縣徭不利乃嘯衆圍之急或勸希武逸去愕然曰我何逃我死與協理城工官經歷余冕典史陸錦鄭鵬徐士科巡檢鄭元英皆遇害邑人立祠於老堡歲時祀之余冕字服周南城人由吏員官柳州時叛蠻數千攻圍冕與希武奮不顧命起殺賊遍身中矢猶罵賊不屈竟被碎屍

舊志參江西志

林梓福建漳浦人隆慶五年守梧州歲荒賑禦有

法民無死徙以艱去累官通政使

舊志

李錫歛縣人世襲新安衛千戶隆慶六年春以征蠻將軍代俞大猷鎮廣西時府江賊復猖獗巡撫郭應聘與錫計徵兵六萬討之破賊巢數十斬馘五千有奇獍酋楊錢甫等悉授首錄功進世職二級柳州懷遠徭尤獷悍隆慶時大征古田諸徭懼而聽命知縣馬希武之官繕城塹程役過嚴諸徭殺希武及經歷等五人復反巡撫應聘與總督殷

正茂議征之萬厯元年錫令參將錢鳳翔等六道  
並進錫自統水師次羅江獨當其衝時賊屯板江  
大洲潛以舟來襲錫伏兵敗之會鳳翔等亦至賊  
悉舟西遁追擊之連破楓木大山天鵝嶺等巢錫  
以水軍殲潯江督諸將攻斬渠魁二人復破數巢  
直抵靖州界賊奔大巢亘數里崖壁峭絕為重柵  
拒官軍鏢弩矢石雨下婦人裸體揚箕擲牛羊犬  
首為厭勝諸軍大呼直上四面舉火賊盡殲先後

破巢一百四十獻馘三千五百有奇俘獲撫降者  
無算永福永寧柳城並以賊告洛容獐又殺典史  
錫令王瑞討永寧楊照討柳城參將門崇文討永  
福亦孔昭討洛容已帥舟師屯理定江節制諸軍  
甫二旬四道並捷斬首四千五百有奇洛容賊首  
陶浪金等俱伏誅錫以功進秩二等

明史  
藁

楊大韶建平人隆慶間任武緣縣治尚嚴明減值  
錢以甦里甲置社學三十餘所立學田草攬納邑

人稱快

舊志

霍與瑕字勉齋南海人隆慶六年為廣西按察僉事飭兵左江土酋黃金彪背逆督撫方議進討與瑕剪其羽翼一矢不遺縛致之遂定以四都叛復不常致南太二府道路阻絕奏請於朝開建新寧

州治州人祠祀之

參廣東通志

蘇湖雲南人隆慶六年知藤縣清欺隱興學校申飭鄉約復行條編訓民子弟招撫犛獍潔己愛民

政教煥然一新以外艱去士民為立祠

舊志

吳善字元夫福建龍溪人隆慶間擢永寧兵備兼撫夷時古田諸徭新創永福古河毛崗及上宋等巖猶反側不靖善繕兵芟除戮其渠魁陸銀床莫良滿等散其黨羽悉與更始且權諸要害設營置堡以為長久計又築城建學擇其稍秀異者隸學而化誨之萬厯初柳慶北三北五地煽亂善搗破賊巢俘馘萬計以軍功歷陞副都御史巡撫廣西

府江徭叛平樂兵又告變善簡率將吏親入險阻  
悉平之嶺表一清十五年晉兵部侍郎總督兩廣  
清軍政恤民瘼凡苛條悉從報罷而責成吏治尤  
切力疾運籌卒於官贈右都御史卹廕如制

參福  
建廣

東通  
志

鄭茂字士元莆田人隆慶末以河南按察使左遷  
府江兵備先是諸徭蠻憑陵出没伏箐勾劫每歲  
官捐冲灘魚鹽之羨犒之戒勿出掠而肆毒如故



船非聚至百不敢發茂至即上書督府大集軍兵  
直搗其巢斬馘一千六百有奇以三崗改為二土  
司屯兵扼險開仙迴馬尾二營以通永安復修廣  
運足灘二堡以控府江創昭平縣治以控平梧諸  
徭斂跡投款鹽艘不滯旅次無恐皆其績也

舊志

侯國治南海人萬歷初知思恩府恤民愛士首先

教化捐俸遷學於城內土風一變

舊志

王瑞黃巖人由南丹千戶以功遷永寧參將時陽

朔荔浦諸蠻憑險作亂總兵李錫檄瑞偏師夾勦  
諸寇悉平由間道疾趨理定上宋諸巢盡掃賊穴  
河池哮喘諸崗恣行剽掠與柳州北三賊相表裏  
巡撫吳文華檄瑞經畧乃與兵備副使吳善決策  
率勁兵討之既平哮喘佯若班師者北三偵知弛  
不為備猝薄之奪其險殲之尋卒

粵西  
文載

徐作南昌人萬曆二年以副使兵備府江時南源  
殘孽因碎江賊起復陰助之榕崗喇崙六窟等巢

附馬圍張村據山灣永安路絕作督參將王承恩  
分道進勦斬首二千餘級復峰門寨賊守山灣益  
固復命參將王瑞攻克之昭平上下四屯巨賊黎  
福莊怙險為逆作以計縛之五指巖最負固旋復  
討平後賊相戒無犯

舊志

陳一定揭陽人萬曆二年由瓊山學諭擢懷集令  
勤撫字緩催科修建學宮課士日繼廩庖增置學  
田以資膏火養老月給粟帛剔奸禦盜政績偉然

志舊

彭應時字宜所廬陵人萬厯初官僉事時思恩土  
司兄弟爭襲弄兵違制議欲加兵應時以蠻寇穴  
鬪兵一發則亂必多殺無罪乃單騎入其巢溫言

慰撫兄弟悔禍感泣遂釋兵聽命

江西通志

凌雲翼字洋山太倉州人萬厯三年以兵部左侍  
郎提督兩廣軍務代殷正茂進征羅旁乃大集兵  
令兩廣總兵張元勳李錫將之四閱月克巢五百

六十俘斬招降四萬二千八百餘人岑溪六十三  
山七山那留連城諸處鄰境犛獠皆懼賊首潘積  
善求撫雲翼奏設官戍之論功加右都御史兼兵  
部侍郎六年夏與巡撫吳文華討平河池哱咳北  
三諸犛及廣東大廟諸山賊嶺表悉定名為南京  
工部尚書加太子少保以病歸節舊志  
吳文華字子彬連江人廣西提學副使萬厯初授  
巡撫粵西方旱災流亡載道疏請賑恤不待報先

發廩庾仍乞糴鄰省稍倣常平法給散募兵能墾  
荒者予牛種地利益闢覈田賦均驛傳飭兵戎疏  
設昭平縣建養利州學割武緣縣屬之思恩移兵  
備於鬱林增河池同知經畧種種足規永利襲擊  
昭平賊首黎福莊斬之乘夜攻下五指白冒諸崗  
斬俘甚衆隨招撫餘黨二萬餘人即其地建置營  
堡以田畝分授新附及諸戍兵又撫降岑溪諸獠  
事聞俱賜金幣柳州北三巨寇賊巢也最慄悍號

剗馬賊諸將皆憚之文華策之曰賊強而負固宜  
智取毋力爭適河池咳嗽有警選卒七千餘俾參  
將王瑞倪中化往勦既得捷即馳檄諸將曰吾名  
攻河池耳意固在北三今河池捷北三謂我兵疲  
且休必不我虞可擊也遂督兵分道進賊果不為  
備連破七十餘巢斬四千八百級俘獲稱是未幾  
以將母乞歸癸未起兵部右侍郎仍撫粵西復遷  
總督兩粵禁絕獻遺裁節經用清釐虛餉而尤軫

恤窮黎平府江諸徭及懷集賊首嚴秀珠方文華  
未督粵時山海諸寇出沒縱橫蹂躪州邑官軍雖  
往往小捷然得不償失自文華任事造發造撲無  
使滋蔓每命將出師授以方畧往無不克尋入為  
南京工部尚書就改兵部引疾去卒贈太子少保

謚襄惠

參福建  
通志

譚大寧字彥貞高明人萬曆初授太平府推官思  
明土目陸酋橫甚往者率如其饋大寧至酋密獻



千金峻却之而廉悉其不軌狀白監司兩府竟縛之思明合境以安陀陵隘而荒為撫流移開田萬

計縣供以裕

廣東通志

羅黃裳字美至高明人守平樂為人剛果廉介警敏有才萬歷四年與府江道徐作計擒巨魁周公樓黎福莊等諸賊定上下四屯設兵防禦立寧化里以增國稅循良異政郡人尸祝

舊志

李應祥湖廣九谿衛人積功至廣西思恩參將萬

歷七年巡撫張任大征十寨應祥與有功即其地設三鎮築城列戍復從總兵王尚文大破馬平賊

韋王明等尋入為五軍副將

節舊志

張任字希尹嘉定人萬歷六年以右副都御史巡撫廣西時大藤峽八寨蠻連龍哈哖咳二土司為亂任簡行伍申約束蠲逋賦發公庾斥貪墨吏士皆淬厲乃抽銳而伺刈其東崗尤黠者捷聞賜金幣明年數搗其穴不三月悉俘馘蕩平又上善後

七策一曰設三鎮二曰戍要害三曰分汎地四曰  
遷衛所五曰廣屯田六曰開道路七曰議糧餉疏  
下有司次第行之會病卒詔贈兵部左侍郎時督  
兩粵者劉堯誨移駐蒼梧與任寅恭共事凡所謀  
議建達兩人悉協心而允濟焉堯誨字君納臨武  
人操守嚴正門無私牘又節省雜費羨三十八萬  
餘貯藩庫以充國用陟留都御史嗣晉南京戶部  
尚書轉兵部所著有虛籟集

參舊志

尹廷俊雲南蒙自人萬曆初以部郎遷知永寧淡  
薄自操殫心勵職力白寃誣雖得謗亦不為動州  
民樸野立鄉約集老稚惓惓訓誨首創學宮擇其  
秀者肄業三年刑清訟息百姓祠祀之

舊志

陸萬垓字仲鶴浙江平湖人萬曆七年知梧州府  
清慎慈惠擒撫猺蠻開東安西寧二寨興學育才

府治火萬垓躬為經始百度維新

舊志參浙  
江通志

方思賢廣東順德人萬曆八年知昭平縣時邑甫

平百度草創城垣雖建多傾圮猛獍四出思賢日  
夜親自督守鑿馬灘山石繕公廨學宮鋪遞公館  
次第告成北陀獍黃璉寶等負險不服征輸監司  
已議征勦思賢直抵其巢宣布威德璉寶等銜恩  
帖服即願輸逋額仍縛璉寶出謝罪

舊志

林春茂閩縣人萬曆八年知懷集縣值金鵝猛亂  
大肆鴟張春茂請兵勦平時詔清丈以懷足額力  
請免量民得不擾請減鹽餉二百四十兩商民稱

便縣志

薛志學字海觀常熟人萬厯間知天河縣縣四堡

皆沒於賊志學折簡諭之悉歸復治有循聲

江南通志

李曰巽字順之長樂人萬厯十一年知蒼梧縣廉

正明允減差役免災米修書院社學邑人感之

縣志

呼良朋字如蘭鎮東人歷官至總兵佩征蠻將軍

印鎮廣西時昭州叛卒據三崗峰門為亂良朋檄

參將白玉間道趨荔浦身自督兵繼之奉命征府

江部分諸將以二萬人為四隊絕險並進斬虜獠  
賊數千進擊諸支崗盡平之綏輯良獠至千餘家  
乃置戍建堡分田給餉以其閒令戍卒刊蒙翳治  
橋梁郵置亭館絡繹不絕兩江之間往來如砥掄  
聞賜金綺未幾以母老乞歸

獻徵錄

周宗道廣東澄海人萬曆十三年知岑溪縣時獠  
賊新平留心安撫減額徵置官驛建學宮以興士  
類祠丁孝子民夷向風卒於官民為立石祠祀舊

志

鄭時章龍溪人萬曆中知平樂府加意撫綏省刑

薄賦政尚寬大民有寧居

舊志

林喬楠晉江人萬曆十三年知梧州府綜核政務

尤切拊循蠲水火災米豁清丈重稅賑傷殘通糶

糴處置有條民蒙其惠擢本省副使

舊志

顏志邦字小山茶陵人萬曆間知永寧州明決不

苛訟簡刑平廷無疑獄斥苞苴省冗費不私一錢



州人嘗竊謂曰顏侯惟飲吾寧一水耳值久不雨  
志邦從里民數輩徒跣禱赤日中親歷隴畝憂形  
於色未幾雨如注歲登大有民歌曰此顏公雨也  
諸獐婦多蓄蠱毒志邦悉按之法且為好言以諭  
之其習遂除

舊志

毛鶴騰字翰伯博羅人廉介骨鯁萬厯間遷左州  
知州署事崇善徙上石西州育士愛民所至有惠

聲建祠專祀

舊志

蘇朝陽字鳴廷福建晉江人萬曆十七年任懷遠令懷遠三經殘破官皆借居融縣朝陽親歷各崗諭以禮義築城丹陽鎮實心措注版築不擾又為民詳請立石嚴禁科派一時民謠率皆向化遷知

柳州府

舊志

郭忠鼎字蓋臣江西泰和人萬曆間任潯州知府郭外兩江分兩關故例三日一放湍急舟擁每易覆溺忠鼎不時啓關稅額外毫無染指謠民雜處

一意勤恤訟者無煩刑贖緩之苦時稱其多惠政

舊志

孫繼先字志顯雲南人萬曆中知陀陵縣奉檄紀  
驗賊雋招降賊屬三百蒙賜金遷知上石西州  
故為思明黃獠竊據弘治中改流官然莅州者苦  
治荒僻多寄孥於府間一入州視事及繼先始新  
州治攜家人以往拓城甃井開闢草萊復建社稷  
山川城隍境內諸壇廟奠其神人比於列郡

滇志  
參一

統志

黃淙字仲文南海人萬厯間任平南縣興學校革

吏弊民沾其德

舊志

黃文炳晉江人萬厯十八年知平樂府政治持大體興學校置驛馬復餘田民甚德之又手訂郡乘

府志

蕭彥字思學涇縣人萬厯十九年總督兩廣廉潔儉素軫民艱食奏請蠲賦而輸梧關稅羨以資國

計邊防籌畫周悉卒於官

舊志

任思字繼野四川南充人萬曆十九年知恭城縣廉明仁惠軫念民艱歲饑發穀賑濟不足請官帑往衡永告糴活民命以千計在任五年無逋賦無

冤獄邑人建祠祀之

舊志

楊寅秋字義叔江西泰和人萬曆中遷廣西副使擊叛獍韋公成等定五山又擊叛猺黃朝田等定府江先交趾黎莫構誑貢道久絕廷議勦撫爭持

莫決寅秋獨主綏輯黎果來款左江鳴吠不驚邕人相率祠報之後以疾卒撫按交疏請卹其畧云交南折華之勲方之銅柱府江破竹之烈過於金

城詔贈太僕卿

舊志

陳大科字如岡通州人萬曆二十一年出撫廣西會田州土官告變授計右江道討平之上善後七策大要以弛征撤戍柔懷新附為本又岑溪七山等山獠嘯聚復授計左江諸道討平之已而疆外

蠻黎莫二姓構兵請於朝為布立恩信以術招徠

二姓皆請降

舊志

周起元字仲先海澄人萬曆中任廣西參議分守

右江道柳州大饑羣盜蠡起起元單騎招劇賊而

賑恤饑民甚至移四川副使

舊志

林恭章字爾肅莆田人萬曆中歷官按察分守潯

寧平明四郡交趾通貢稅例歸臬司恭章大書關

外自誓不受交趾一物

福建通志

黃流芳字若瓚博羅人萬厯間官按察副使宜陽  
天河縣為土司蠶食邊界下檄責其罪狀土酋惶  
恐不敢擾柳慶間多劇盜率諸將削平之進參政  
部蒼梧首飭軍政境內肅然在官以廉節自敦文  
武將吏無敢以餽遺進者嘗語吉水鄒南臯曰非  
敢異物率吾性耳

廣東通志

翁懋勳崇安人萬厯間知賀縣草寇竊發至即撤  
兵招之盜如故遂直入賊寨諭之曰若曹苦饑寒



乃聚為賊耳吾當為若請賊感泣乞降迄終任無

敢叛者

福建通志

陸長庚字元白浙江平湖人萬曆中累遷桂平道廉正有才猷首韋扶仲盤花婆擾府江出沒荔浦大殺掠時用兵進勦費餉十三萬長庚力請制院撤兵且曰願勿中制事成不敢居功遂留兵三千守荔浦城餘盡撤賊果懈防守乃密與副總兵童元鎮定謀夜率兵至白馬冲襲獲其妻女募猾猺

十人誘扶仲出劫遂墮我伏中力戰逃去荔浦兵已扼其歸路分道要擊擒之盤花婆亦授首餘黨聽撫八寨等諸路悉平歸功制院長庚賜金綺晉

爵一級

浙江通志

凌嗣音浙江烏程人萬曆二十七年知梧州府清靜平易當岑溪北陀大兵後兼助大工中璫權稅嗣音為先事綢繆裁節有方人心遂安

舊志

劉炅江西南昌人萬曆二十七年知藤縣與民休

息捐俸建學造士稅璫起藤蒙二江稅於五屯採  
金人心皇皇與太守凌嗣音力爭其弊強項不

屈

舊志

歐陽東鳳字千仞潛江人萬曆二十八年遷平樂

知府撫諭生猺白監司擇俊秀者入學猺漸知禮

義稅使橫行力折之以才調知常州

舊志

陳煥臨海人萬曆二十九年知懷集縣重學興文  
軫恤民困除耗羨修陂塘盡力田畝凡饋膳所須

必同民間給直時議運官鹽煥以懷民素不習舟

楫懇為申免士民建祠以祀

縣志

劉邦徵萬歷丁未任荔波知縣荔介黔粵極邊內地不親歷如守土何馳至邑檄諸蠻於前推誠撫諭蠻為懼伏凡所規畫悉聽邦徵命白上官請置縣治於喇軫村歷任數年蠻終不敢蓄異志百姓

立祠以祀

舊志

李應裕字履順婺源人萬曆三十八年任平樂府  
撫夷同知設治在深山箐崗中山嵐為毒流官多  
不久駐應裕身與撫循犷性暴直與居民小不合  
輒格鬪至是斂輯盡吐露寃抑應裕戒吏民毋為  
虐立社學稍知字附為俊秀犷始有向化者三權  
稅賀橋一意寬恤後乞休去

婺源縣志

童時明字醒余淳安人萬曆四十年知永淳縣躬  
履阡陌勸民耕種悉心籌度詳革諸不便於民者

興學校修縣治舊志

譚虬字玉潛廣東新會人萬歷四十三年知恭城縣政多仁恕每朔望進諸生講課凡民間疾苦必委曲詳詢務得其狀會歲大饑捐俸作粥活民命

千餘舊志

謝君惠將樂人萬歷四十四年知懷集縣保赤愛民重修學宮建文昌書院為治振刷糾紛奸不能眩邑人有青天之譽擢刑曹復以郎中出守梧州

剔弊汰冗清聲尤著府志

吳宗教武陵人萬厯中知容縣縣多毒草民以小隙輒服草傷命宗教訊必反坐又捐俸每兩約納毒草有根者若干朔望焚之毒草遂絕歲旱饑糴

米於鄰勸富戶出粟賑活多人

湖廣通志

陳鑑石屏人萬厯四十五年知梧州府甫再月梧城大火城内外公私廬舍俱盡鑑徒步周詢所賑以千餘計皆出橐中及借公帑時有乘機夜掠者

捕獲以軍令徇民乃安是年粵西復大祲柳慶橫  
邕潯梧稻盡槁諸郡殍死相藉鑑發倉粟平糶盡  
則以價轉糴東省接濟民食闢梧陽書院以教十  
屬生徒修護堤浚鱷魚池瀦蓄其水為學宮後奠  
在任四年陞潯州分守道去建祠祀之

舊志

盛萬年字恭伯浙江秀水人萬曆四十五年任右  
江巡道駐賓州歲戊午旱魃為虐所轄十餘城郊  
圻盡赤道殍相望谿崗林箐諸蠻乘機嘯聚窺逼



城池土官偽檄調兵侵地龍城一帶遠邇震恐萬  
年力請當事得一旅為簡材官謀勇指授方畧以  
少擊衆斬獲無算又秘製火器設伏殲之諸賊聞  
風膽落列戍防守以備反側不常賓地屹然為重  
鎮旋議賑饑捐俸為倡復借餉市米減價平糶置  
粥廠瘞遺骸白仇獄以免株連請查曠役糧餉約  
數千有奇移文罷徵而市米所贏為賓民代輸兵  
餉流移稍得安集會循例入賀士民保留不獲因

建祠而尸祝焉

參舊志節蕭雲舉碑記

林夢琦晉江人萬厯己未任南寧太守時當大荒後邕民猶在瘡痍夢琦下車問民疾苦發倉賑濟是歲秋遂大熟民得不病

舊志

陳邦瞻字德遠高安人萬厯四十七年巡撫廣西尋遷總督兩廣上林土官黃德勛弟德隆及子祚印叛德勛投田州土酋岑茂仁茂仁納之襲破上林殺德勛掠妻子金帛邦瞻移師討平之邊土以

寧敦尚風節服官有守物望推之

節舊志

梁子璠南海人天啟二年知蒼梧縣逐積蠹革陋規凡供役病民者悉請裁省郡舊為陰城樓廊燬幾盡復建則益病民子璠請撤敝補新修為陽城興學造士以品行為先聽斷明允而不為深刻院司知子璠廉介委之權稅正額外毫不自潤後擢御史以論事杖戍尋放還歸

節縣志

鄭圭浙江仁和人天啟三年知平樂縣正已愛民

撫字催科俱有法度民得暇力勤於耕種頻獲有年捐鹽羨以助遼餉積公餘以造浮橋堂無爭訟野絕追呼後陞去士民作逢年亭以寄慕思

舊志

王政岐字體仁臨川人天啟五年任陽朔知縣朔瘠而好屠牛歲輸官八百金曰牛判稅政岐首禁私宰弗取其稅調知臨桂里長例為鹽商挽舟灘峻水駛遇舟鹽損責賠累死無算為力請於上獲

免通邑祀之

舊志

謝杞字君含江寧人天啟間知新寧州有廉聲不  
事敲扑賦額克辦署隆安篆却例金抵欠餉以甦

民困

江南  
通志

李邦才鶴慶人天啟六年知懷集縣凡鹽課陋規  
河廠羨餘匱頭加耗盡報院司秋毫無取值徭寇  
謝龍崖倡亂單騎入嘉崗營以計擒斬之境賴以

安尋卒

舊  
志

鄭茂華字實符江都人天啟間累官廣西布政使

時魏璫所在立生祠茂華獨不為動治有政績崇  
禎初舉卓異召對進巡撫廣西御書天下清官於

屏

舊志

王國相山西人崇禎三年知全州性廉介甘澹泊  
盡草錢糧耗羨勸民息訟偶有聽斷惟以理諭尤

重士政暇講學諄諄誥誡如父兄

節舊志

錢積中字彥華襄陽人崇禎間任賓州判州俗獷  
悍積中以禮讓化導民始知學歲苦徭獍侵掠躬

冒矢石追捕之擢本州知州州人於城南清風樓

下立祠祀之

湖廣  
通志

章金鉉漢川人崇禎五年以御史出知梧州府公

明剛介綱紀振肅而不為深苛士農商旅各安其

業有循吏風

舊  
志

汪繼英字志在休寧人崇禎間任鬱林州同知署  
州篆勵清操草火耗民便之適潯貴剽馬賊震鄰  
繼英躬自禦賊地方賴以安州有水口勢直注將

傾民居繼英建高閣砥下流築長隄作迴瀾涖任

數載舊篋不增一縑

休寧縣志

姚張斌字憲卿臨川人崇禎八年任蒼梧道政事

詞訟裁斷立辨而好學不輟圖書外無長物清節

卓行人咸稱之

舊志

衷崇寅南昌人崇禎九年任梧州推官公明敬慎  
案無留牘每一事必洗心滌慮究悉周詳故大讞  
多所平反常自謂敕罰之司稍涉輕率則故入故



出之咎不能自免於心舊例府僚歲理厥務一季  
崇寅以職司明刑不關錢穀辭讓之其清介有足

稱者

舊志

林贄福建人崇禎十年歷廣西左布政擢都御史  
巡撫時值楚寇數萬入境圍全州人情震動贄靜  
鎮省城訓練固圉檄狼兵廖琦等數千赴全授密  
計破之寇去全賴以安流寇張獻忠不敢窺粵皆

其功也

舊志

金九陞字允訥全椒人崇禎十二年任蒼梧兵巡道時尚猺豕突於北流信宜之界東省官兵敗走之復返於西焚掠鬱林北流總督張鏡心令九陞會勦九陞偵知賊巢即督鬱林知州劉履丁北流知縣張問士會同弁目直趨鳳皇山口先後擒獲滿朝哥等一百九十餘名殺傷無算殲厥渠魁餘氛盡滅復葺瑞泉書院故址以課諸生崇禎十五年調上荆南道復會三省合勦八排猺尚九陞監

軍督餉勞績最多以病乞致仕去

參江南省志

施召徵無錫人崇禎間任陸川知縣培育士類有  
惠政甫陞去遇山寇被執不屈而死妻馬氏不為  
賊污亦從容自縊士民悼之志

黃景明晉江人崇禎十四年以禮部郎遷督學力  
挽浮靡文風一變人不敢干以私志

朱國玘浙江嚴州人崇禎間任思恩知府十六年  
隆安土賊馬日仙以妖術惑衆橫肆猖獗四月率

衆犯思恩人心惶懼奔竄國玘分遣官兵奇正互  
用一戰禽之餘黨盡散民賴以安土民刻石頌其

功舊志

汪德元歙縣人崇禎十五年任蒼梧縣省刑法絕  
苞苴目擊民艱憂形於色時楚三藩避寇入梧德  
元調護禮敬備至衛兵驕悍則挺身扞禦禁其暴  
虐賀縣土寇起郡戒嚴參將出師防禦境上德元  
往來餽運糧餉拊循百姓賊撲滅城中乃安舊志

董克正合州人崇禎間知陸川縣時兵饑游仍克  
正勸課耕種倡導孝弟署北流興業兩縣勦賊有

功所至皆有利澤

舊志

廣西通志卷六十八